

KVZrU – 100-Jahr-Jubiläum, 12. Juni 2009
«Begrüssung»

Text und Moderation Christoph Meier

Liebi Jubler und Johler
Geislechlöpfer und Meise-Chöpfer
Pfäfferstampfer und Wäffel-Chrampfer
Gümper und Stümper
Fäld-Riiter und Gäld-Striiter
Vierspännerfahrer und Tierkänner-Scharer
Vetterinäärer und Vetterisüüffer
Alt-Adjutante und Määrilitante
Vereinszwängeli und Füredrängeli
Presidänte und Chosli-Änte
Vierkämpfer und Stierdämpfer
Busch- und Husch-Pilote
Jagd- und Magd-Riiter
Spring- und Singhelde
Wii- und Schii-Puure
Wald- und Bald-Arbeiter
Bolle- und Chole-Sammler
Mischt- und Mürtschestock-Bestiiger
Pominänti und Solvänti
Cow- und Sauboy
Rossschwanzmeiteli und Siitescheiteli
Richter und Schlichter
Walzer und Balzer
Platz-Chefe und Platzhirsche
Vorständigi und Rückständigi
alti Chlöis und jungi Möis
Uus- und Ipildeti
Profis und Schlufis
Amatörli und Langöhrli

churz: liebi Rösseler!



Es isch truurig aber wahr: mer müend das Jubiläum absäge.
Das häisst mer müends nüd absäge, will mer händ gar käs, es isch ales en Irrtum.

Wämer de Kavallerieverein Zürisee rechtes Ufer mit C schriibt, dänn isch er mindischtens scho sit 1893 bekannt, hüt also 116i! Staat ider OKV-Bible – und wër die aazwiiflet, mues zwangswiis 10 Jahr in Huusvereinsgemeinschaft mit em OKV-Presidänt läbe.

Aber s'wird na schlimmer: Wämer sich druf verlat, dass die wos 50-Jahr-Jubiläum gfiired händ, kä Chlöis gsi sind, dänn simmer es Jahr z früe dra, will die händ ändi Oktober 1960 gfiired, we de Ruedi Günthardt sicher cha bestätige, er isch nämli det als 24-jährige Schnösel scho Presidänt gsi und frisch pachne Team-Silbermedaillegwünner vo de Olympische Spiel z Rom. Und wër DAS azwiifled, mues sich 10 Jahr lang jeden Abig Gschicht vo Rom alose und em Ruedi immer nacheschänke debii – das chönt emänd na meh ad Subschtanz ga als mit em Fankhuser s Bett mües täile...
Au s 25-jährig Jubiläum hät mer im 35 gfiired, s 75-jährig aber im 84i – mer sind also im Sinn vo de ständige Beschleunigung vo de Ziit doch nüd ganz dernäbed mit euser Fiir!

Aber wämmers mit em Name ganz gnau nämed, dänn gits de **Kavallerieverein** sit de letschte GV gar nüme, dän chan er au nüd 100 Jahr fiire, sondern höchschtens 99, und de **Riitverein** Zürisee rächts Ufer isch erscht guet 100 Tag alt. – Also chönte mer äigetli glich wider häi.

Aber will d Kavallerie-Musig scho so schön gspillt häd und er ali da sind und die äinte sogar öpis zahlt händ, chömer ja glich echli bächere und fiire. Mer chönd ja durefiire bis im Oktober 2010, dänn würs ja ehner stimme und mir gsäched sicher all uus we hunderti.

Aber es söll ja nüd völlig anonym zue und hër ga – es fiiret sich doch vill ringer, wämer wäiss, wem mer da grad zueproschted – und will ihr ja samt und sonders Spitzesportler, also Riitspitze- oder spitzi Riitsportler sind und au gäischtig sicher durchuus na regsam, wett ich jetz gschnäll eu all churz begrüesse. Demit s nüd allzu äifach isch, hani eui Nämme echli iipackt. Wër sin Name erchänt, söll doch gschnäll s Füdli lupfe und det wo das nüme mügli isch, söll er äifach gschnäll winke, dänn gsehnd en all. Wahrschinli händ nach dere Üebig all d Hals-Cheeri, aber mit echli Alkohol-iiriibe gat das wider weg.



Es hät garantiert Nämme debi wo nüd da sind und defür fëled ander, wo da sind, aber nüd uf miner Lischte xi sind. Falls da druus schwëri Depressione oder Magersücht sötid entstah, empfil ich s Schlössli z Oetwil oder d Hohenegg z Mäile. Ich hett ja gern ali Agmäldete zwunge, au wüekli z cho, demit das mit de Nämme stimmt – aber da hät mer äifach d Autorität vom OKV-Presidänt gfëelt. Ich ha mi aber bereits für en Workshop bi ihm agmäldet.

Also los:

(Aktiv-, Ehren-, Freimitglieder)

Es isch bis hüt, wër GÜNT-HARDT umkämpft i dem Verein – RUE-DI-hine!
– und wämmer dä ggune hät, gilt: En R-I(e)S-LëER-t der Ehrebächer natürlig schnäller als en Bodesuri, da chasch lang de WÜETRICH spile und voller GRIMM im TRÜEBE fische – du findsch nu SCHMUTZ. Chasch uf en andere STERN-ATHimmeltecki ue, chasch voll HOHN-EGGE-Riisse, du chunsch UMI-KERTO que si!

Vilicht bringets di in ZOLLI-KERli, oder binded die anen BAUM-ANNe, aber i den alte Tage bisch au du kän BÄR meh, kän Wiitsprützer, nuna en SCHU-PISSER.

CLAU-DIA CHÜ, PFERd und Schöf und verstecks i dere Halle, wo immer chliner wird! Aber pass uf mit so Sprüch: ufzmal wott der eine de Grind abhaue, sonen CHÖPFER wo WILD umefuchtled und mit de Fuuscht wott Arbet AM MANN läischte. Ja, da MAX di jetz echli, da wirsch WIISS im Gsicht, chlinen Apezäller hä!

I den EICHEBERGE Räblets, ganzi BUECHE Riisst um, die ganz MATHY-Sötsch vergässe, kän PFENNINGER meh isch si wert, chasch ZOGGeli abzie!

Chasch d Hose UE-LI-tze, d WËLT-In Hosesack në, d Gufere zuebinde, alles DENZLE, Rumooore bringt nüüt meh, abhaue is RIETH, MANN, na en HAGGE MACHE, Rassig d BÖSCHig abesieche, d'MOSE Riibe, am BARTH chrätze und für d RossBOLLE-TERmin zum Zämeläse nagle vor de SCHMID chunt, aSIL-VIA BERN-HARDnäckig cho beaträge.

JE-NNYe het ich tänkt, dass de MESSMER scho gli chunt und mich - ohni SCHERZ - wott loosha, chum bini das chline Läbes-MONTI uegchraxlet wänds mi uf em MÜLL-Erledige!



(Junioren)

NO! VOT NYd! Da WACHT-ER dänn scho, min Junior, dass der Alt nüd eifach uf sone fLOTTI Art verSCHÜRCHt wird!

Das wëred emal d Aktiv-, Ehre-, Frei- und Junioremitglieder gsi, jetz na de OKV-Vorstand und d Vereinsdelegatione!

(OKV-Vorstand)

Solang ich deVOR-STAND uf de Bühne, zwingt mich käne inen Verein, da machi kän FANK-HUUSERed ihr doch won ihr wänd! Fëälti na, dass mich jede frO KaVau-Bürogummi chönt verSTEINERe!

(Vereine Sektor 4)

Mit VEREINte Chreft gönds ad SEK! TOR 4 pUST ER uuf, ziet ene Gopfrid-STUTZ de letschti ZAHND, bis nuna chönd WALSER-Wasser suuffe. Min PoSTÄ-Fertlädied mir, wänn die am See obe meckered: HENZI gfröget, öb mir dë SPRECHER uushalted? Sonen Doppel-DAEPP WET-ZIKER dass all mäined er sig BIG-LËR isch sis Gschwafel, simmer ehrlich!

e LeGO-SSAU isch das, da chasch nu bätte, dass es gli NEU-KOMMt, dass Plän gSCHMIDet wëreded zum es BRÄNDLI lege, giftigi Pilz-SPORE Rüere, dem plapprige Pegasus sött mer KÜNGigung gö, en mit ere SCHER-Erstäche, en im WALD als WILDHABER uussäie, ufs KLO TEN erscht uf de HIL TE BRANDSatz go rüere bis alls wona GRÜEN IN GENTech macht BRUN Isch und d HATTz uf de BISCHOF cha losga!

Jetzt na ganz aktiv gschnäll die Passive:

He, mach SCHNELL, MANN mer gönd na uf e SprUTZ-Tour dur die PASSIVERe Regione, dä hämmer öppis z verzelle VON ALLMEN und WALDER, vo WILD wo a de BÖSCHige umechraxlet, SchNIGGLI-Schnäggli wo durechrüched – solang eus de WOLF nüd is WÄDI biisst. Fange mer LIS-A, S'UTER vo dem Chüeli isch sicher nani voll. Und soo schlimm wird d HITZ nüd sii, s wird schon wider LAUENER am Aabig, ja KULLtvierter: lueg das MOOS, MANN a dere BUECH, MANN idem HOF, MANN! – He, Mann, chöntsch au mal *Frau* säge? – TU-ORe hät dë? – Näi, Mann, dasch puri LoGICK! Säisch ame GRAFesteiner ä nüd MENZImuck oder?

O WE! BERn isch wiit chlöned d B-RUTH. Das verschDANI –EL-ter Lüüt SI, MONE das säge, möged nüme nach eme STURZ EN EGGE Rund schliiffe. Jede Af-F-RITZt im RESCH-taurant e Kerbe in Stam-M AU RERugge händs THO! MASTerklass!

(Jetzt hämmers grad gschafft, na d Gescht!

ACH HAMMERmässig wërs mer chönted au na paar Gescht verbrate, dänn chönted mer da au en HAGGE MACHE Radibutz. MAAG si, dass es paarne PI Ois es LIECHTI uufgieng, das mir ohni WÄCHTER nu SCHINDLEReie im Grind händ und kän Rappe uf de Bank. ROL Fürschi bis is Gmäindshuus Herrliberg: i-GITT-Er will mit Japse-Wërig zahle: "JEN-Nye" gilt a euser Kasse!

WERD ER mer nüd TAUBER wäg paar fuule Sprüch wo mir IN AUEN und Fälde useposuuned. Susch hässts dänn: What e MESS-MER müend ufruume! Wänn KÜEN Z'LIslig sind, HOLL EN STEI, mach Biff-Baff-BUFF und jetzt isch Schluss!

Die wos nüd gmerkt händ, dass vorcho sind, chönd gäg en chline Jubiläumsbiitrag an neue Platz de Täxt uf de Vereins-Websiite in Rue studiere. Und die woni vergässe han, sölled sich bi de 200-Jahr-Fiir früener amälde oder de Partner nach der Amäldig nümen uuswächsle! Und dänn gits na paar wenigi wo sich sötted umtaufe la – hä ja mached Sie emal öppis mit 'Bäbler' – guet es Versli het mer chöne mache: Es hät d Brigitta Bäbler, e Hütte voll vo Räbler! – oder 'Chupferschmied' ich au en soumässig schwirige Name, wo me vilicht ime wüeschte Riim het chöne verbrate: Lueg da chunt de Chupferschmied, wo sälte uf sim Stupfer liit" - aber de Fredy isch berüemt genueg als Bergmeilemer Star-Schauspieler.

Nach dem Names-Salat isch jetzt s Salat-Bufferet eröffnet.

Achtung, lönd zerscht die Alten ane, die bruuched Vitamine zum di Junge uushalte.

En Guete!